

廣
西
名
勝
志

廣西名勝志卷之二

閩中曹學佺能始撰

桂林府所屬外州縣共八處

靈川縣

在府東北五十里

本始安縣地唐龍朔二年析置以靈渠水爲名按
卽灘水也出縣東北九十里之海陽山與湘水同
源北流爲湘南流爲灘灘水自興安縣南入陡出
大融江入縣界縣東有淦江西北有路江縣南有
白石湫東北有耳水皆入焉淦路二源俱出猓峒
白石湫出白石巡司潭淦上唐李義山詩所云龍

移白石湫也其水源出融山北界經縣西南穿過
大山下東流注于灘○高鎮山在縣西南二里古
名大衆峰一名大藏其下有潭橫浸山腹名衆潭
其形三折又名之潭元至正年大藏山崩後名其
所崩崖爲赤壁因名赤壁山及建祠以祀諸葛武
侯○真仙巖在縣西南三里石屋穹窿可坐數十
人乳花凝結爲纓絡寶蓋之狀又七里曰仙隱巖
門高五尺邃若堂皇秉炬而入百步有深潭投之
以石聲若鳴鉦古傳神仙棲隱之所又十里爲華
嚴洞高廣數仞清泉環繞昔時有桃花片濶寸許

從洞中流出石壁上有詩云巖前流水無人渡洞
口碧桃花自開東望蓬萊三萬里等閒歸去等閒
來○千秋峰在縣東北十里獨立危聳下有峽通
大江名千秋峽銀江之水出焉南注于灘○舜華
山在縣西二十里峰多奇秀如冠如笏如人趨而
拜之狀又十里有讀書巖宋秦方兄弟讀書處○
雙蓋山在縣西北十里高百餘丈兩峰回峙若張
傘然又二十里爲靈巖山大江洞其腹濶數十丈
深不可測遙望山根橫光一線迫之乃知巖在山
底水上表裏明徹而然巖口水面拍拍僅容小舟

擊汰而入仰視巖腹與水面正平相去丈餘水深不可施篙仰撐巖腹以行佐之以楫方進尺寸遇聲發則出水皆應大聲叱咤則砰隱若裂可駭當巖正中石穴隆如蓋其下爲神龍所居輿地紀勝云南北相通正如堂殿水灌巖中其色如藍○北障出在縣北倚之若屏障也山綿亘數十里每風颺起則飛鳥回旋不能度俗諺云鳥不過靈川○宋紹聖間秦觀以言事謫嶺南寓居靈川一年嘗賦呂仙茶十二韻右呂仙山在今治西南平阜卽靈川舊縣也其地產茶以唐光化中呂巖遊此因

名宋紹定四年縣令鄭延年始遷今所○莫休符
風土記云出府城北十里有雙女塚俗傳二妃來
尋帝舜卒葬于此塚高十丈周迴二里餘○風土
記又云府北郭松逕盡處有安南都護普讚塚普
讚靈川人其宅今爲聖壽寺有廟在寺之北下歿
後殯于此時有識地勢者言葬所有天子氣由是
掘斷至夜又有陰兵填平如舊旣而再掘復平不
已時有効役者宿其所夜聞鬼兵相語曰能以青
布運土投江則我等無能爲也及明主吏聞宿者
言遂用青布輦運土投河竟免陰兵填築今墳所

樛嵐猶存有石人石柱松楸百餘株或云訾家洲
因遷此土流下成洲有歐陽脰者爲絕句云舊業
分明桂水頭人間業盡水空流春風日暮江頭立
不及漁翁有釣舟○予閱隆慶間邑人全陽靈川
志云靈川自唐武德四年平蕭詵置桂州總管府
領始安福祿等十縣尋改始安爲靈川福祿爲臨
桂按始安自梁大同六年改置桂州卽爲郭下之
邑謂靈川析自始安則可以始安改爲靈川似于
義未叶且福祿省入始安在唐貞觀二年尋卽改
始安爲臨桂未可以改福祿爲臨桂也宜從通志

爲正○志又云靈川得名本于靈渠渠行五十里
入大融江名曰靈江又西北有黃柏六峒川江三
水合灘水爲同流故曰融江言通融也靈之義得
于渠川之義得于三水並下按州縣凡例未有所
二字以取名如靈本靈渠川本三水者通志以唐
龍朔二年置靈川縣蓋縣西三十里之龍巖村有
山高數十丈居平地中龍朔二年山忽晦冥者七
晝夜大雷雨龍升而霽山腹遂空高三十丈許長
倍之石間鱗甲至今隱現若存其下爲深淵莫測
故水從西江來者皆滙之西江卽六峒黃柏川江

也其源俱出全州西延之境與湖廣新寧交界迤
七都蠻峒而來六峒居中黃柏川江在左右以成
川字故巖亦曰靈靈川曰靈川耳龍朔之時顯此
奇異卽以是年置縣義亦取諸此也若靈渠融江
俱在興安境與靈川何涉至小融江始爲靈興二
縣之界小融江亦自興安來至江南大埠口始
與大融江滙左右刺合故曰灘津○大融江又下
二十餘里爲千秋峽叢山列棟尖峭如筆亦名筆
峽風水相搏濤色如銀名曰銀江其氣清淑四時
若秋故曰千秋又過縣南二十里之甘棠墟與甘

江合又十里之白石潭其水甚深相傳縣南二里
許有蛟精塘昔藏妖蜃傷隄害物南齊永明四年
始安內史裴昭明夢神女七人雲冠玉佩各執小
旂圭印自言爲荆楚以南司禍福之神此方被妖
蜃所害今當禁之于白石湫旣覺詢其故得之先
時湫水險急舟觸無所不敗乃爲建祠秩祀湫水
遂平唐李義山詩神護青楓岸龍移白石湫卽此
○邑東南盡處爲堯嶺古謂之東嶺有東嶺神祠
李唐以前更爲堯廟其曰秦時建者本軒轅彌明
詩中祖龍開國盡遐荒廟建唐堯鎮此邦語耳今

祭品實出靈川○舜華山與堯山相望下有池曰舜池○又有盤古嶺民建盤古祠于其上盤嶺而南爲半雲山卽莫休符風土記所載雙女陵及安南都護普贊塚地也邑之南界接臨桂之北○縣北十里北障山與堯山對峙高廣稱之山周環八百源其著者滑石泉也泉出黃石似泥非泥昔人鑿以龍首注爲塘禪士全用誠依泉結庵居焉宋崇寧間鄒浩竄昭州北還過此題云馬頭今日度嚴關十九年前去復還惟有流泉聲似舊凭欄重聽響潺潺南渡紹興六年胡舜陟帥桂易名爲潯

玉泉因題詩云奔走塵沙五十程泉聲今夜響
冷與朝晝鼓催征騎不使行人仔細聽至我朝
萬曆壬子歲縣令蔣一葵更名道鄉泉蓋湖南岳
麓有道鄉臺張宣公爲鄒忠公設者而蔣令與忠
公同爲毘陵人云按今有道鄉泉碑亭在山心舖
官路側去小融江渡里許○塵沙行半日烟火是
靈川縣只三家市渠通大斛船官空無現俸稅重
有荒田太息王郎子棲遲欲四年右宋乾道間知
靜江府張孝祥過靈川作也昔聞嶺外徧江灘今
日方知行路難越鳥啼時紅槿發潭蛟潛處碧波

是唱歌跳鬼家家重擊鼓招賓夜夜懼獨有風塵
流落客每思鄉國動長嘆石 國初編修冉庸謫
居靈川作也已上俱縣志所載志爲全公賜撰字
申甫嘉靖辛丑進士授南戶部郎左遷四川簡州
同知稍起浙江嚴州府丞致仕于家以著述爲事
自號月華山人以邑西南二十里有月洞山臨江
其所讀書云

興安縣

在府東北一百三十里

唐志全義縣註云本名臨源武德初始安置大
曆三年峒寇萬重光誘桂林等九縣構逆獨臨源

不應因名全義太平興國二年避太宗御名因改
興安舊城在今縣西唐李靖築○柳河東集有全
義縣復北門記在今縣西五十里居民尚以全義
名坊卽此○臨源者以地臨湘灘二水之源也舊
城在縣南鄉廖仙井傍遺址尚存按水經注云灘
水與湘水出海陽山而分源湘灘之間陸地廣百
餘步謂之始安嶠卽越嶠也水自嶠之陽南流注
灘名曰始安水故庾仲初賦揚都云判五嶺而分
流唐通典亦謂之臨源嶺嶺在縣北三里卽全義
嶺也海陽山在縣南九十里山形如覆釜有巖極

幽邃東燭而人行數百步至水泉處潤不盈尺其
深莫測有司以每歲九月九日致祭○注水經云
始安水又南與瀉水合按瀉水源出南鄉名桃花
源又有融水出融山二峒中零水出縣西南五十
里鬱金山俱南流入灘○靈渠在縣北五里卽導
灘水者也亦名秦鑿渠始皇命屠睢伐越史祿轉
餉乃自零陵上流鑿渠至桂林渠內置斗門三十
六所每斗門開之以俟水積漸進故能循崖而上
建輓而下旣通舟楫又利灌溉號爲靈渠漢戈船
將軍出零陵下湘水卽此路後漢伏波將軍馬援

因秦舊渠開湘水六十里穿度城仍折而北入于
湘今名中江是也至唐寶曆間渠道崩壞觀察使
李渤乃疊石造堤如礪嘴狀劈分二水每水置石
斗門一使制之開離水則入於桂江壅桂江則歸
之湘水又鑿分水渠三十五步濶僅五六尺以便
行舟其後咸通中魚孟威宋慶曆中李師中相繼
修築之渠上有漢伏波祠○古秦城在縣西南四
十里其側有秦王廟蓋始皇二十三年築以限越
者通鑑唐昭宗光化元年馬殷引兵取桂州自秦
城以北望風奔潰卽此宋曹子方詩海窮山盡尚

南征解肉銷殘只自驚回首長安八千里此中那
得有秦城張孝祥詩塹山湮谷北防胡南築堅城
更遠圖桂海冰天塵不動那知隴上有耕夫○龍
蟠山在縣東十五里本名盤龍唐天寶改今名山
有石洞其門數重遊者秉炬而入常見龍跡於泥
沙中其大如盤嶺表錄異云山有乳洞斜貫一溪
名靈水溪溪中魚皆脩尾四足丹其腹人不敢捕
否則有風雷之變○石康嶺在縣西過八十里逶
迤至縣後旋而向之其下源泉四出南有雙女廟
廟旁有石突出高五丈俗呼神石石罅濶寸許請

雨于廟者用茅探鱗以瓶盛之須臾水隨茅出注瓶仰望嶺巔雲起而雨立至○乳洞在縣西南十里上有上中下三層其中虛明夏涼冬溫內有清泉噴出沿石壁左流成溪觸石湍急有聲透洞門而出卽下洞也左旋而上十餘步疊石爲臺地勢夾埕有田數畦左方三石如柱旁有隙路可通入石室是爲中洞水氣蒸潤常有煙霧旋樞又沿石道曲折凡數百級至上洞入門平曠淺溪可涉垂乳玲瓏有五色石橫亘其上又行數百步有石高十餘丈色亦五綵石床鐘磬異響殊狀宋李邦彥名

之曰飛霞洞隸書曰玉谿橋三字又有張孝祥大書
上清三洞四字○里許瀨渠有鳴玉洞洞中石筍
懸注一石盤承之泉聲琮琤如鳴玉然亦名梵音
洞○草聖巖在縣西十五里前有寺今廢唐僧雲
嶠習草書其中有雲嶠書堂及滌硯池巖之東有
穴圓如月名月山又五里爲白雪峰峙立渠江之
側皤白如積雪故名上巖深廣可容百許人○唐
承裕宅在縣北二十里五季時承裕自中原避地
于此後入宋仕太祖有璽書亭藏藝祖所賜書淳
熙間張栻爲之記傍有清泉色如碧玉其例異常

是俱山市數十家里人呼其處爲唐家宅按卽今
唐家舖巡司也其裔有唐則字世範唐叟字元老
以文章卓行著聞于時○宋宣和中尚用之任本
路提刑後寓桂州水東石佛真教二寺南來諸士
夫多與之遊卒葬興安子孫因古籍于桂○王應
辰興安人宋慶元間以能誦九經作春秋語孟義
兼通子史貢于禮部時九歲後數年其第應申亦
九歲貢入前後試國子監中書省試俱免文解○
元傅與礪興安縣詩亂峰如劍不知名篁竹蕭蕭
送驛程轉粟未休灘水役負戈猶發夜郎兵百蠻

日落朱旗暗五嶺風來盡角清空使腐儒多感慨
西南群盜幾時平○明分宜嚴嵩宿興安別署破
木古松喧夕籟遠峰寒露起層陰梅花兩岸湘灘
水歲晚相隨到桂林齊安黃珪次韻路傍花向馬
頭放亭外柳垂池上陰愁絕寒崖人不到可憐啼
鳥度前林○予開洪伯常興安志曰興安隋仁壽
中置縣唐武德四年析置宣風貞觀十二年省至
德二年改興安爲理定復爲臨源據言梁分始安
置臨源縣則臨源何時廢而至至德始復耶唐志
通志未有隋置興安之文興安至太平興國元年

遯太宗諱始改全義爲今以縣有始安水及始
安嶠併用年號以紀之也與安斷自是時始○志
云點燈山在治西三里有巖爲陶隱士讀書處夜
間常有燈光故名按卽解學士詩陶生巖畔草青
青也又過二三十里爲龍山唐質肅公先塚在焉
質之蔣生中立所惕大宜山碑云宋質肅公先世
之墓也然大宜山屬南鄉原不與龍山爲一安知
龍山非質肅公塚耶桂州提刑李師中送唐介赴
貶所詩有去國一身輕似葉高名千古重如山之
句則介爲興安人無疑而墓在江側之龍山亦無

疑故解縉詩曰唐介墳前江水聲也其時想必由
興安順流而抵全州故題曰過全州偶成云○志
以石康嶺有雙女廟不知所自按治南有雙女井
流入灘江世傳有王姓者清明舉家皆往祭掃止
遺二女在宅風雨暴作忽陷所居二女沒焉其井
源深不測首合靈渠則雙女必爲神而石康所祀
者必此神也○嚴關在治北十七里兩山壁立上
鑄嚴關二大字或謂漢歸義越侯嚴出零陵下灘
水定越建功由此故名又謂此關當隘路而可畏
也桂林諸生徐謹征西記云宋末經畧使馬堅以

阻元兵鑿馬坑嶺斷路處

陽朔縣

在府南
百四十里

本始安縣地隋開皇十年分置取陽海山爲名水源所出北流爲湘水湘中記云湘水之出於陽朔則觴爲之舟至洞庭日月若入於其中也按金石古文有云漢陽朔碑字字畫奇古則陽朔之名亦既久矣置縣曰始于隋○縣舊名歸義有古城在今治西十五里之歸利鄉○古樂州城在縣南二十里白面村山下唐武德初置樂州於此後移入平樂○新林驛在獨秀巖之後分置歸義縣時有

此唐貞觀初併入陽朔遂廢今人尚呼驛頭街（）
葡萄驛 國初洪武二年立正統間廢卽今之葡

萄墟 今驛名古柞原在縣北十五里其移北郭

龍頭山下亦以正統時（）龍頭山高百餘丈以形
似而名唐詩人曹鄴家在焉今建慈光寺于此

縣理設在都利山下注水經云灘水又南逕都利
山是也以出香草故名一曰都荔漢樂章云都荔
逐芳卽此治南數百步爲鑑山其石光瑩與縣治
拱揖時見人物車馬之形有鑑山寺唐同光年建
有宋太宗御製碑（）烏山在縣南五里濱江其形

如鳥舒翹而立下有白鶴觀基址○東人山在縣東南十五里此山之狀似人冠帶而拱揖其西亦有石如人冠帶若坐而受之者宋縣令萬齊詩數里西山路千家夕照村霞光迴樹杪山影倒雲根吏少空庭舍人歸附郭門地偏風俗好鷄犬任黃昏○碧蓮峰在縣西十五里峰巒重疊簇出如蓮華唐沈彬題云陶潛彭澤五株柳潘岳河陽一縣花兩處爭如陽朔縣碧蓮峰裏住人家○里許爲威南山其下有吳威南將軍墓又爲塘山下有湧泉潄流爲淵山巔之氣與威南相接傍有乳洞中

多滴乳觀源之溪出焉○屏障山在縣治左峽其狀正方如屏宋陶弼詩名山愛陽朔平陸逼峰巒郡境尖中折人家缺處安○寨山在縣西二十里稠密四固如寨馬氏湖南割據置戍于此山下卽歸義故基也其東爲讀書巖曹侍郎鄴讀書于此國初叅議解縉詩云陽朔縣中城北寺人傳曹鄴舊時居年深寺廢無人住惟有石巖名讀書○畫山在縣北五十里離江之上九頂屹立丹崖翠壁望之如繪○廣福巖在縣南二十里中有複閣堂殿兩傍石室疊如層龕有羅漢像俗卽名羅漢洞

也今爲戍籍居之溪橋樹色宛若桃源○縹山與
臨桂接界舟入陽朔必先歷此亦可以棹艇遊于
其中○東暉水在縣西北雙月溪在縣東南各三
里許達于桂江○西溪發源縣西山曲折遶明珠
洞前人桂水○興平水在縣北三十里源出寶子
山南流者爲興平與桂江合北流者爲零陵水出
道州○犀潭在縣西三十里龍濟松江二橋水匯
處中有石穴云犀所藏岸傍細草如茸呼曰犀草
○飛泉在縣西五十里泉湧山腰懸石百級飛注
而下如掛銀河入于桂江○唐吳武陵陽朔縣廳

壁記畧云群山發海嶠頓伏騰走千里而北又發
衡巫千餘里而南咸會于陽朔陽朔經四百里孤
崖絕巘森聳駢植類三峰九疑析城天柱者凡數
十里如樓通天如闕刺霄如修竿如高旗如人而
怒如馬而齒如陣將合如戰將潰難乎其狀也而
又灘江荔水灌織其下蛇龜猿鶴焯焯萬惟縣分
山間其土黃壤其方十里其勢險其形感千人守
之十萬不能攻東制邕容交廣之衝南扼賓蠻巖
象之隘一日有盜則吾檻其吭而有餘縣西七步
有石渠其浚十仞仞之下有洞洞有水深百尺

有亭可以宴樂遊處肆在亭西廩在肆西鄉吏士
胥黎人商賈夾江而宅基置山足山多大木可以
堂可以室其花四時饒紅紫望之森然猶珊瑚瓊
玖予又不知夫崑崙崆峒其名安取而勝茲茲籍
戶五千其稅緡錢千萬於桂爲大故俗獷而人狡
吏苛而政暴尤難其正寶歷元年正大夫有事罷
渤海李湜裁縫其闕浹時而俗咸變又以見吾宰
之能官入也○按吳武陵所稱海嶠衡巫諸山會
于陽朔者蓋指海陽山而言卽靈興二縣界之陽
海也其地在楚粵之交爲一嶺所限嶠以北皆荆

楚之域也海者泉盛大之稱水北曰陽故曰海陽
其水北趨而分湘灘者爲龍巖又東南出泉曰棹
巖水下陽朔一山一巖分湘灘朔爲三水故名三
山海陽今始安嶠去陽朔下蒼梧者乃其故道故
漢書曰或下灘津或下陽朔也○宋陶弼到陽朔
縣五管新多事輕車屢往還勤勞成白髮故舊是
青山樹色纔分楚江聲未出蠻自慚迎候少無患
及孤鰥又石壁深深遠縣衙不離床祇見煙霞民
耕紫芋爲朝食僧煮黃精代晚茶瀑布聲中窺紫
牘女蘿陰裏勸桑麻欲知言體絃歌處水墨屏風

數百家桉弼字商翁零陵人宋慶曆中從楊畋討湖南徭有功得授陽朔簿久之復合陽朔故有再至之語弼在任課民種樹休蔭道旁他郡縣數百里內悉效之

全州

在府東二十五里

領縣一

本漢零陵郡之洮陽縣也隋平陳改洮陽爲湘源唐因之五代晉天福間馬希範請置全州改湘源爲清湘縣附郭 國初設全州府後仍改州以清湘省入○桉全州之名本于湘山寺僧全真也詳本山下○零陵郡故城在州北三十里地名梅潭

城輒俱存又五里卽故洮陽縣水北曰陽以洮水
遶其南也俗名改州離有驛曰山角驛卽洮陽驛
矣○湘源故城在城西七里地名柘橋後周顯德
三年徙入城今長盈倉其故址○湘水之南五十
里有越王城卽水經注所云越城嶠也後漢建安
十六年吳交州刺史賴恭自廣信合兵出零陵憇
于越城以却步騭者○方輿勝覽云熙紅樓萬屏
樓曲水亭依綠亭楚南偉觀樓俱在郡圃今廢宋
刺史柳開楚南樓詩洗盡蠻煙几案空登臨直見
楚山雄坐當鴻鵠高飛處身在乾坤灝氣中木落

有情瞻北閼霜輕無夢入西風凭欄自是蓬瀛客
獨對瀟湘興未窮○按開字仲塗宋開寶進士端
拱元年知全州時西溪洞蠻粟氏亂開至出府庫
金帛率牙吏勇辯者三人招其酋賜衣帽緡錢親
爲撫慰居數日遣還如期携老幼數百人至公悉
加賞犒營室以居作詩鑑一篇示之刺諸石公無
事常留連山水任意嬉遊自稱無礙道人故王禹
偁集中送柳無礙序有云江山猿鳥之姿雲泉竹
樹之美皆在指顧中矣○湘春樓州城大南門也
宋陳覲有詩今名鎮湘○皆山樓在清湘縣南宋

紹興間令安圭建楊萬里記今爲鐘樓○捲煙閣
在州西磐石山椒取柳仲塗詩中語也柳詩云古
寺聳山椒公堂去不遙尋僧忘俗慮盤道出塵囂
疎箔捲煙霧明眸望沈瀟漁翁江上立指我在雲
霄○唐黃滔寄湘中鄭明府縣與白雲連滄洲况
縣前巖僧同夜坐江月看秋圓葉拂莎庭石茶檐
乳洞泉莫耽雲水興疲俗待君痊宋陶弼過清湘
嶺開巒土斷此地下湘川綠水紋如染丹楓色欲
然瘴消還愛酒兵解尚憂邊故里誰相訪孤帆出
曉煙○湘山在州西一里峰巒鬱鬱巖洞幽深絕

頂有飛來石相傳自羅浮飛來者其稍夷處曰筍
布臺寂照大師經行之所有湖山寺唐咸通二年
建寺門二層徑長百餘丈始入殿由兩廡升遶殿
後有浮屠俗名無量壽佛塔卽師示寂處也巔有
甲亭眺覽郡中如在畫圖林岵詩云雲歸楚峽靜
江入甲亭幽卽此又有法華玉虬二泉宋析彥質
詩寓久渾忘客臨行似別家途窮身更怯秋老鬢
先華生計黃茆合歸期碧海賒湘山今夜雨番飛
意無涯韓駒詩湘南第一境山水足娛人塔占飛
來石僧番過去身雲泉蒼壁曙竹樹絳園春羨爾

安禪客脩然不受塵□魏禹卿西事珥云湘山寂
照大師俗姓周名全真郴州人初遊吳越謁師於
雙徑得安樂法作偈云有物先天地無形本寂寥
能爲萬象主不逐四時彫人皆知其有悟後訪勝
得湘山荀布臺因住持焉會昌汰釋氏師一夕生
肉髻鬚髮併長乃衣紫霞衣入覆釜山結菴而居
刺史韋宙迎之四門各見其入莫辨其孰真也示
寂時年百三十二歲其遺蛻在湘山妙明塔攷內
典以慧而覺者曰熾盛光佛以文而覺者曰無量
壽佛則無量壽自有別義佛之壽固不以年也○

柳山在州北二里郡之主峰舊名北山爲柳刺史
所遊賞因卽其姓爲名有寸月臺拔地七十丈岡
巒廻複禽鳥希踪二江東流波影炫目柳公仲室
築室讀書有書堂紹興間州守林岳爲之記魏禹
卿云近日柳山書院應泉井中有巨石乘風雨飛
入井內昂首低尾狀如龍馬其高廣正與井之石
甃相似實嘉靖壬寅四月七日也○湘水發源于
陽海與離分處地名鐮嘴匯而爲潭名曰泮潭導
入中江在湘離二水之中陽海之舊江也○泚水
出州北三十里之文山山下出泉清激有聲故名

水經注云洮水出洮陽縣西南東流注于湘水漢
英布軍敗走江南高祖令別將追之擊布軍于洮
水南北皆大破之如淳注云洮陽之洮音韜蓋布
舊與長沙王婚其敗也布往從之洮水出長沙國
境內故布之軍大敗于此劉宋武帝繼母舅蕭卓
爲洮陽令文帝元嘉三十年宗慤以功封洮陽侯
皆其地○羅水出羅氏山經州西五里飛鸞橋灌
水出灌陽縣南經州南二里小村口俱流注于湘
○州東南合江門對岸有山巋然舊名鉢孟山卽
羅灌入湘處 明知州顧璘易爲完山有合江亭

觀察茶陵龍大有建舊刻詩云高秋來眺合江亭
江上新生白鶴汀塞北風煙聊息駕湘南丘壑自
忘形十年髮爲離騷變千里雲隨嶽麓停同是明
時投檄侶倚看雙闕對秋青○三華山在州南五
里與湘山寺正對頂有三峰形如華蓋湘江遶出
其背明黃暉詩金翎拍海山鳥鳴寒光拂曙天欲
晴溟濛瑞靄洒霏翠仰視不見華峰青湏臾捲幔
山林薄傍柳縈花繞城郭南山玄豹藏已久文彩
斑斑變龍籙○隆城山在州東一里有古頽垣如
城塹狀○獅子巖在州西四里以形似名亦卽湘

山之一峰也徑由歸雲菴而上有白石如帶可五六丈許側隘不可通俯視石罅僅二三尺秉燭而入深廣可容三百人中有數疊如階磴然又十里爲石燕岡有巖高深二十丈時有石燕廻翔其中○礧巖在州北十五里飛泉如練琮琤激越故以礧名中有石田石鼓蓮華臺閣之像甚多宋胡寅謫居清湘遊此鐫五言古詩十二韻諸石又城西南三十五里有青田巖城南四十里有波斯巖皆稱絕勝○倚石山在州南六十里以巖石相倚故名建安之水出焉舊設建安驛處○神仙巖在州

北六十里爲古神仙所居有石刻幽徑二字○黃
華山在州東北六十里郡國志之黃山也橫亘如
榜舊名獵山○覆釜山州西長鄉跨湖廣新寧縣
界其山上接層穹下臨無地遊者扳緣絕壑而上
有天馬佛足諸踪產掃階竹僅尺許葉密而小乾
久不脫○鉛鋤潭在州西境宋吳曾記云予布衣
時從內翰汪公彥章遊汪謂予曰柳子厚所記零
陵山川問諸長老咸不知所在每爲之嘆息予乾
道辛卯六月來守清湘偶長樂鄉四十七都民有
投牒互訴櫟林灣乃鉛鋤嶺也予欣然曰此子厚

之所記也方子厚時湘源猶未建州故屬零陵與
記中語合予以居官不得出常恨不獲親至其所
考子厚之記散行宴坐乎水石之間覽小丘冉溪
袁家庄之勝以慰其平生而汪又去世已久不及
告其所未知者故著于茲以爲好遊君子指踪焉
○范九皋廟記云虞舜二妃廟在城南一里漢初
平元年建唐元和九年重修柳宗元爲之記○伍
子胥祠在江頭村其吳伍姓者合祀之漢鄧禹祠
在龍水壩鄧姓者祀之○亭渡廟在城北昇鄉渡
南祀英布韓信彭越三像○趙大夫廟在城南三

十五里或云晉大夫趙宣子也廟記以五代時有
趙侯者河東人爲湘源令因家焉卽所居立廟祀
其先祖鄉人以感應祠之○中殿廟在州北六十
里山口肇自後唐天祐時原設白茅灘宋天聖間
遷此○柴侯祠在州西四十里大陂之陽宋嘉定
中賜額威信侯名崇趙唐末人爲河北邢州守棄
官聞湘山寂照大師道行來從之遊僧衆稱曰柴
君歿後年餘忽積雨暴漲溪水湍急有大木自覆
釜山湧出下陂江已而泝流復上五里夜聞空中
有聲云吾柴君也欲于此建廟鄉人以其木刻神

像祀之號柴君祠宋初州境寇至侯現神兵列城
壘前賊懼望風奔潰紹興間有孔彥周曹成之難
侯顯化如初今城西湘山麓者其行祠云○盤石
廟宋黃庭堅記曰廟在州西三里許故全州使君
王侯廟也侯諱世行字祖道開封人初任全州都
巡檢使會儂智高入寇世行率民調兵以扼賊衝
百姓安堵湘人德之安撫使吳中復等薦其可用
權守全州州益大治歿後立廟于此盤石之下有
泉出焉是爲盤泉一名玉髓泉其味甘冽○志云
章後都陽人洪武元年知全州府與同知淮安李

習協心民事嘗植松豆百餘里勢若參天大者至
五十圍廣蔭道路人謂之引路松徐謹西征記以
爲宋咸平初陳堯叟所植云○周健錢塘人宣德
初知全州任蒲民千餘詣闕請畱乃進奉直大
夫還治少師楊士奇贈以詩有歸到清湘三月暮
郭南騎馬勸春耕之句○顧璘字華玉應天府人
正德間守開封以忤中貴謫知全州最久所著有
浮湘集州北二十里迴龍巖其所開也○唐諫字
子方宋元符間以三舍上書論時事後入黨籍屏
居田里久之易名登政和五年進士知峽州時士

大出蜀者皆挾巨商重賕公盡發之卒以謗免友
人贈詩云但得歸舟輕似葉何妨蜀客怨商征○
廖遂明者尚氣節工文詞尤長于樂府陳尚誼南
遷過全州郡將待之甚峻遂明獨相勞問如故舊
自斜北歸學士析彥質亦貶嶺南道遇之間南中
相識以遂明薦彥質因邂逅與語甚悅欲與之偕
遂明慨然不辭一日渡海風濤大作遂明持劍厲
聲曰有宋忠臣在風濤遂息其壯勁如此○唐仁
杰苦吟樂隱時同調陳德誠出守池陽仁傑以詩
貽之云紅旆渡江霞蘸水青蛇出匣雪侵衣德誠

善之因勉其入金陵會休沐朝士集于昇元寺召
仁傑往酒行請賦登閣詩仁傑沈吟少頃立就有
句云雲散便宜千里望日斜長占半城陰衆皆閣
筆如元白之選楊汝士也○朱冕字德父元符中
王鞏坐司馬光黨貶全州冕偕弟袞從之遊鞏每
評其兄弟冕真純不苟袞開爽有文後冕以孝行
聞于朝至和二年賜粟帛黃魯直南遷過其家贈
以詩云萬里瀟湘一故人白頭親老尚懸鶉環家
但有千竿竹望日空耕一畝芹其風致如此○陶
崇字宗山十歲賦詩有驚人句登嘉泰二年進士

召試館職慕柳子厚爲文嘗撰宋鏡歌鼓吹曲反
楚詞七叙以進理宗甚嘉嘆後陳時事忤權貴出
知信州卒于官所著有激齋集○蔣公順字成父
從魏了翁遊學有所得嘗築室湘濱名其居曰鵝
寄日吟味讀書以自適鶴山爲之銘 國朝于中
字子正以學行稱洪武初應辟授監察御史內直
賦詩有太液暖風吹御柳瀛洲春日醉仙桃之句
爲時傳誦立朝彈劾不避因忤旨謫雲南歸厚縣
丞稍起南雄府通判卒所著有黃鶴山樵詩集○
成弘之間蔣昇蔣冕兄弟也 至南京戶部尚

書見大學士全賢乞休爲海內名德

已上皆
全賢人

○宋

管及其先經雲人因遊清湘家焉崇寧間爲宜州

理曹黃魯直被謫至時黨禁甚嚴親知絕跡及周

旋之甚篤將別山谷書析桂亭二字貽之○李壁

字白夫武緣縣人選交冠之難居全積書至數萬

卷日與生徒誦讀其中

已上皆
流寓

煙閣遙聞向曉鷄

水平舟靜浪聲齊高林帶雨楊梅熟曲岸籠雲謝

豹啼二女廟荒江樹老九疑山碧楚天低湘南自

古多離怨莫動哀吟使客淒右唐張泌過湘源作

也歌聲野色中人樂歲時豐暑雨陰晴雜秋田早

曉同嶺雲無烈日江樹足涼風自指鄉山語前村
有路通右宋陶弼題霞溪驛也北戶書頻到南雲
鴈不飛試評騎馬路何似釣魚磯擊析黃茆店篝
燈白竹扉故園桑柘煖亦有稻魚肥右范成大宿
深溪驛也又殊堂中松永日如鳴琴我登雙松堂
時步雙松陰下有寂莫人安禪無古今右黃庭堅
題雙松堂也南北東西幾萬峰郡城如在畫圖中
何人裁斷湘妃竹半醺秋江作釣筒右陶全過全
州作也霜林紅葉襯桐花路轉崖根百尺斜霽日
新雲成徙倚湘南秋盡未還家右朱子恭題招義

驛也陶生巖畔草青青唐介頌前江水聲兩岸好
山看不盡畫船槳鼓到全城右國朝解纜過全州
偶成也千章喬木拂雲霄一徑松陰路欲迷泥滑
草深行不得滿山風雨鷓鴣啼右黃鎬入清湘遇
雨也

已上皆
旅客

灌陽縣

在州南
凡十里

隋大業中蕭銑析湘源置及灌水去縣南九十里
自興安界流入水北曰陽故曰灌陽也春陵古碑
考云後漢獻帝有熊尚初者拜騎都尉灌陽長縣
丞沿之大學士蔣冕記以灌陽有縣自孫吳始卽

其辭蜀寒陵等四郡時云○峽山在縣北五里夾
江峙岸幽聳蔽日形似三峽故名縣有沙羅馬渡
龍川鹽川諸水咸匯于此東流入湘攷水經注云
觀水出臨賀郡之謝沐縣界西北逕觀陽縣西卽
此水也灌古謂之觀其入湘處謂之觀口○華山
在縣西南七里有虞帝祠江水遶其麓唐馬薺湘
川弔舜詩伊予生好古弔舜蒼梧聞曰日坐將沒
遊波疑不還九疑雲動影曠野竹成班爲集蕪陵
渚猿啼霧露山南風吹早帆曉愁長闕元化誰
能問天門恨久闌○迤邐巖在縣西二里又爲

巖前後洞門敞朗約深十餘丈廣二十餘步如大
厦形又八里爲仙源洞世傳有柳子厚遺跡其傍
有大源塘○打鼓洞在縣西四十里水經注云觀
陽縣東有裴巖其下有石鼓形如覆船扣之清響
遠徹卽此洞也其水流入灌○井院泉在縣北二
十里又十里爲新墟泉俱在與安界來流入灌江
小富水在縣北六十里自旗嶺山流經昭義凡江
以入于灌○沙河之水出九龍巖中通別澗有石
藤九其形盤屈如龍水流入灌陽灘唐戴叔倫宿
灌陽灘絕句十月江邊蘆葉飛灌陽灘冷上舟遲

今朝未遇高風使還與沙鷗宿水湄

永寧州

在府西一百五十里領縣二

唐析始安縣地置純化縣永貞初改慕化乾寧初
又析置古縣 國初改古田成化間設于夷隆慶
四年都御史殷正茂平之疏改設州曰永寧○州
主山爲寶蓋黃源之水出焉北流合永福水入于
離而州北之大長江源出都狼山州東之東江合
四源水皆注之○方輿勝覽云東郭先生廖扶家
有丹砂井一族數百口飲此井者皆百餘歲按州
東有巖名百壽舊名夫子巖宋紹定己丑知縣史

涓鑿百壽字于石崖蓋指此也今壁有平古田碑
○虎踞巖在州東南二里石柱崢嶸光明弘敞秉
炬而入有石大士滴乳天成從巖而下又有金竺
巖深窈廣遠流泉一泓其上疑溜物象森錯○將
軍巖在州西五里洞門之右若將軍踞坐然入半
里許上下方平如砥有石乳恍垂芝撒網等狀○
穿巖在州西三十里穿成複道如覆屢屋坦長二
十餘丈人馬通行之地忘其爲奇也○天村山在
州西南一百里山頂有田居民耕種成村故名○
都狼嶺在州北六十里初黃巢寇嶺南溪峒蠻應

之逼州城主者執當堅守于向曰徒示弱耳卽上馬引兵與賊戰于都狼山連挫其鋒巢斂衆以避乃逐利深入大戰于洛陽坡後兵不繼向氣益振提刀橫擊賊莫敢櫻會暮峒蠻散去向被重創道卒巢因陷桂管按向字仁忠臨桂西鄉人時署高駢牙門將云○宋高登字彥先漳浦人少孤力學宣和間爲太學生與陳東等上書乞斬六賊不報紹興二年廷對極言無所顧避有司惡其直授富川主簿轉古縣令廣西帥沈晦問登何以治縣乃條陳十餘事晦曰此古人之政今人難從不可行

對曰忠信可行蠻貊謂不能行誠不至爾秦民秦
號武斷鄉曲持吏短長登白郡及諸司寘之法一
郡快之帥胡舜陟謂登曰古縣秦太師父舊治實
生太師于此盍祠祀之登曰檜爲相亡狀祠不可
立舜陟大怒撫秦號事誣登專殺詔送靖江獄屬
母死臺塋水次登假歸塋其母訖事詣獄而舜陟
先以事下獄死矣登事卒白

永福縣

在州西
一百里

唐武德初析始安縣之永福鄉置卽以其鄉爲名
我朝省理定縣入焉今有理定堡○鳳巢山在縣

城北本名華蓋隋大業二年鳳鳥來巢百禽集于
山下宋建隆間復有雙鳳巢之守臣以聞詔遣使
鑿巢下石得美玉故以爲名山頂有玉液池其下
卽王世則故居太平興國八年狀元也○麻蘭山
在舊理定界距縣西南六十里寰宇記云從府至
柳州路經此山過溪百餘里方至平路山中有毒
出尋溪水行有伏流有平流峭絕險隘更無別路
柳宗元詩桂州西南又千里灘水闌石麻蘭高唐
挂帥旱禱多由此其水流爲下漏川以入灘木皮
丹竹二江俱自古田界流出注焉而平樂府之修

仁縣界古礫江荔浦縣界之石流江亦相灌委○
太和山在理定城後崖谷盤紆西南有江自古田
出名太和江嶠南瑣記云靈渠自北而南三十二
陡又山灘通銅鼓水自東而西入永福六陡六陡
冬月水消則涸絕不行○又云自理定西行麻蘭
烏沙諸嶺巖絕刺天無蜿蜒迤邐之狀路極逼仄
每遇嶺則直上至絕頂乃下下抵澗水乃已度澗
又復上如此者三四程聞之飛雲九折勢雖險峭
尚可乘車策蹇而行不至若是也諸嶺每遇狹處
謂之院子必有大小石子一堆意必戍士積之以

傳他虞者及詢之則云行人過此必從山下携石
塊寘其下視云願增腳力○宋李師中和李明
叔理定道中幽居日日數歸程已寫華嚴兩帙經
門外初寒江氣白嶺頭多雨燒痕青魯逢飯顆嘲
山笠應載鴟夷笑井瓶客土相思空引望天涯風
景似新亭按理定廢縣卽今橫塘驛基蓋元時自
清音驛移來者○全州志云唐時登政和二年進
士初授理定縣有惠政其子朝俊以蔭補亦宰理
定民間頌其作述之善時仕至澧州守

義寧縣

在州東一百里

寰宇記云石晉天福八年析靈川歸義縣爲馬場後
因陞縣曰義寧○靈鷲山在縣西南十五里峭拔
高峻上有瀑布泉白鹿菴又五里爲巖洞山高數
十仞容十餘榻泉繞洞前舊傳有桃花片大寸許
從洞中流出有題詩石壁上云跨鶴曾來不記年
洞中流水碧依然紫簫吹徹無人問萬里西風月
滿天○義江在縣北七十里源出丁嶺流至蘓橋
分爲三入永福江一歷銅鼓壩東流合相思水入
灘○屺齒痕在江口石磯上相傳蜀漢時有武當
耆僭諸葛武侯征牂牁溺智惠江死焉英靈白晝

標金甲揮升大呼響應山谷嘗臨流踞坐磯上屐
痕宛然可觀○宋淳熙間張栻知靜江府嘗按縣
至義寧爲書義寧縣學四大字刻石見存○廬陵
曾埜通判靜江主管義寧勸農公事節用愛人嘗
修庀公署不勞民而訖成功○縣西南有香林寺
唐咸通五年建卽宋咸淳間遷學來者○北門外
有聖德觀宋寶祐三年建

廣西名勝志卷之三

閩中曹學佺能始撰

平樂府

在省城南
二百里

領州一縣七

唐武德初以始安郡之平樂縣置樂州貞觀改名昭州元大德間陞州爲平樂府 大明因之○唐

李商隱昭州詩桂水春猶早昭州日正西虎當官

路闢猿上驛樓啼繩爛金沙井松乾乳洞梯鄉音

殊可駭仍有醉如泥宋梅堯云我愛昭州路優游

不嶮崎九疑通舜埜八桂遶秦祠亭堠相望處漁

樵有讓時政平無虎闢莫信義山詩○天繪亭夷

堅志云昭州郡圃有亭名天繪建炎中郡守李丕
以興金國年號同欲更之乞名於徐師川久而未
得有范某者爲易曰清輝已揭榜而師川來謁李
視積壤中有片石斑斑如有文字取而滌之乃此
亭舊紀其畧云予擇勝得此亭名以天繪取其景
物自然也後某年月日當有俗子易名清輝者可
爲一考其命名之日與此不差今亭在西山福
聖寺攷亦不存○明宣德間知府唐復字永亨昆
陵人嘗葺郡治建書樓于府學明倫堂復繪古勤
學者以風諸生名曰昭文○西山卽昭山也距城

西百步灘樂二水滙有巨石逕百尺屹立水中其石正方如印亦名印山○按灘江發源陽海自桂林府來至平樂乃名府江以昭州及平樂縣在唐宋之季俱屬桂林水經注曰孫吳割蒼梧之境立以爲縣北隸始安是也平樂至元時始得自稱府而府江之名本于此○水經注云始安谿水又西南注于灘水謂之平水志云樂水源出富川上鄉越恭城縣逶至郡城入于灘灘樂二水滙處蓄而爲潭其深莫測名曰昭潭下爲十六灘最險峻今昭潭驛沿其名又上有更鼓灘荔浦江自西南注

唐刺史敬超先與杜甫善甫寄高適詩序有云
今海內念形故人獨漢中王弼昭州敬使君超先
在耳城北龍興觀有敬公井尚存○明督學使蘓
濬沿革論曰昭介桂梧西北近楚清湘九疑鬱相
樛焉東南入梧巨石急灘如坂上走九溪峒林樾
多爲獠人所盤據一夫不靖醜類陸梁近且芟夷

而蘊崇之刊山通道展爲周行而又增置樓船繕
修校壘廼令單騎直馳往來如織重裝下上帖席
而安蓋千百世之利哉郡治故寥濶山田仰泉不
甚作苦茹茨竹戶魚鹽粗給庶幾稱小康云○府
城宋治平元年太守汪齊築至軋道乙酉歲太守
葛永慶修治之議鑿後山爲壕不果 國朝洪武
十三年增設守禦千戶所始拓開于外三里合之
得五百四十有一丈○廢樂州城在府西南三里
唐武德初刺史汪齊築○廢永平縣在府東北
歷塘村隋開皇置宋開寶中廢○廢龍平縣在府

東南百六十里梁靜州及龍平郡唐富州皆治于此今屬昭平縣思慙里

平樂縣附郭

釋詳府丁然縣自吳甘露元年分富川置則先于府久矣○鳳凰山據城東北勢如飛鳳層松千巖干霄拂雲爲一方之形勝有梅公亭遺址宋景祐中龍圖梅公摯守郡時建○南山在昭潭南岸雙峯挺出峯下有巖深廣數丈資聖寺設焉○東山距城一里多竹木宋嘉祐中里人太子中舍韓廻澹于仕進隱焉號東山野叟轉運李師中有詩題

其隱所○仙宮嶺在府城北宋元符間鄒浩謫居
以江水不可飲汲於數里外後所居嶺下忽有泉
湧出因名感應自銘之曰有穹其山有澄其淵動
惟厥時以出斯泉沛然莫過其源我感我應其來
自天及將北歸數日前泉乃涸浩使人濬之乃於
壘之下得蟹一枚自放於江曰予至五嶺不見此
物數年矣亂石之下又非所宜穴也何從而出耶
苟不云乎物不可以終難故受之以解蟹者解也
夫是告之矣是夜有人至門厲聲呼曰侍郎歸矣
求之不見次日果獲賜環○徐師川集有訪鄒道

鄉居詩序云十一月九日携二監子邀單秀才
步出古觀之西北來鄒侍郎忠公寓舍於拾青閣
故基其詩云履霜頗強健晨興恣所適兩兒休藍
輿呼客同蠟屐危橋出隘巷憑高聊物色蒿然但
林莽蕪廢長荊棘井竈那復遺江山依舊碧要知
千載下懷賢求所歷按師川名俯黃魯直之甥也
魯直謫宜州師川來訪舅氏魯直卒俯寓昭州者
久之○道鄉書院舊碑 國朝嘉靖丁未歲縣令
李圭于道中得井欄一面滌其泥穢有字漸露乃
斷碑也遂徧求之更得數片惜不能成章乃爲置

之學官其詩曰道鄉書院久銷沈誰憶殘碑此日
尋夫爲忠賢苗勝跡人千夢寐感知音貞珉有逐
風霜變妙畫元非鬼物侵讀罷益增今昔感斗山
應借重儒林○忠公同時有元光者昭平人嘗從
公遊公亦至其家及放歸有詩別光云不因投竄
抵昭平那得相逢一笑親塵裏豈知居士意山中
聊見宰官身周顒尚以家爲累元亮惟知酒是真
莫逆于心更何語撥開船子過醪津○看山在城
東南九里峯巒秀聳宛如看黛故名又里許爲縈
山山有九峯縈紆曲折莫窮其致○白雲巖在城

東十里叢林蒼蔚洞門巽然有古藤盤繞之其中
寥廓盛夏常寒成聲肖象之屬甚夥○華蓋山在
城西十里夕陽返照有似火焰 國初解縉詩云
火焰山危下夕陽卽此山也○密山在城北十里
群峯廻合環擁郡治故名近城五里有龍嶽峯宋
鄒忠公得志軒云前有峯數十仞曰龍嶽卽此一
名龍躍考槃之水出焉跨澗有橋曰覽勝○聖山
穿山誕山俱在縣東北樂山里聖山者以譚氏二
仙女尸解于此而名巍峩挿天絕頂高平俗呼仙
殿石前有梳粧臺左右列翠竹二枝仙子將飛騰

清風徐來蹊篁拂空爽氣蕭然○穿山三峯並立
半壁開一圓竅可通往來○誕山亦有三峯譚氏
二女產此山下及長脩黃老之術不知所之一日
里人以不雨爲憂二女至謂之曰汝能餉我卽可
得雨翁第餉之未信也二女甫去果大雨如注翁
知其神追覓不見山下呼之則上應山上呼之則
下應循至一巨石四周無草木二女之衣帶在焉
翁異之白其事於衆是後恒見二女於石上櫛髮
因建廟山下祀焉○後唐陶英字世民世爲青州
人累官太尉天祐二年上書言事指斥時政忤朱

全忠因授太尉征南將軍領兵八萬出鎮昭州故以踈之明年全忠篡位黃憚憚歸于家焉同時有李太尉者簪纓相似子孫累代締姻其山下有峒因目爲陶李峒○誕山之水北流至榕津與沙江合卽故沙亭縣也其上有走馬坪○縣之津平里在虎步江口有廢茶城縣址其上有日巖高數十丈下有巨石近頂左右有两小巖宛如人目黑白分明見荊州風土記

賀縣

在府東二百八十里

本秦臨賀縣三國吳以爲郡隋平陳改置州唐宋

如之臨賀者爲治所 國朝省臨賀入州後又改

州爲縣宋之省封陽蕩山元之省桂嶺皆析臨賀

置者今爲桂屬蕩山等鄉○按桂嶺一名臨賀漢

書張耳傳秦有五嶺之戍廣州記大庾始安臨賀

桂陽揭陽謂之五嶺是也盛弘之荊州記云臨賀

山中有二竹大數十圍有盤石徑四五丈清滑如

棋局二竹屈垂拂掃石上絕無塵穢未至數十里

風吹竹音如笙簫臨水出焉流合賀水元和郡縣

志云臨水一名賀水源出富川卽此水也臨賀水

逕龍門灘水深百尋大魚自躍登此門化爲龍不

過者膝肥點額右在縣東南一名龍谿○浮山在縣東十里挺出江中雖洪濤汎漲此山不沒上有迎碧亭○甌山在縣西十里高千餘丈舊名幽川唐刺史李邵來遊名瑞雲宋守鄧璧以此山多雲氣因改今名其上有泉注爲池名曰仙池○仙池之水流入橘江以注于賀而王山泉天堂嶺之水皆注焉按王泉山在縣西地天堂嶺在縣南各去十里其泉皎潔四時不絕縣北二十里有七十二峯攢竒競秀其中多橘是曰橘田乃橘水之源也唐時有銅冶今廢○按莫休符風土記云天師舊

宅在賀州道錄以爲玄中大法師今以宅爲廟廟
中有美異果實往來人食之無患惟勿採取取必
致禍○唐書李邵列傳邵字子玄延唐人因劉蕡
對策切直爲時宰所抑邵與裴休杜牧等二十二
人中第邵曰劉蕡下第我輩登科能無厚顏疏言
蕡策漢魏以來無與比臣對不及蕡遠甚乞回所
授以旌蕡直不報爲賀州刺史賀人愛之至改甌
山曰瑞雲云其時咸通間宰相韋保衡出爲賀州
刺史畱意吏事不以舊宰輔自居人亦稱之○宋
大中祥符時道州人周輔成舉進士授賀州桂嶺

令終其官以子敦頤貴贈諫議大夫○文獻通攷
有本政書十三卷南軒張栻荅朱元晦柬云賀州
林勲本政書想亦須見其人一生用功于是持論
亦可貴又于其家求得數書有論屯田頃目亦具
有功今給抄錄續當奉寄敬夫時爲靜江府帥云
○通志啓聖紀云孝穆皇太后 孝宗皇帝母賀
縣人幼入宮成化五年 憲廟召幸有娠萬貴姬
知而惡之百方苦楚胎竟無恙 上令託疾出居
安樂堂以病報而屬門官管視六年七月己卯誕
皇太子是爲孝宗皇帝太后少乳太監張敏使女

侍以粉餌哺彌月西內廢后吳氏保護之尤謹已而悼恭太子薨萬貴妃無子禁中漸傳西宮有皇子上與貴妃始召見相持泣下於時皇子六歲矣矩度不凡上撫之大喜徙太后永壽宮臣何

暴卒京師籍籍有異言追封淑妃二十三年 憲

廟崩 孝宗卽位尊謚孝穆皇太后有縣丞徐瑱

者請寃 太后崩逝之由禮部以爲且興太獄株

連蔓引非 先帝意從之但訪求 太后親屬之

在廣西者紛紜良久竟無所得或云 太后李姓

入宮時誤稱爲紀又以爲太后家在賀之迎恩里

白龍塘好竹 孝楊將免忽一日龍塘水盡赤已

而 孝穆生六

荔浦縣

在府治西
八十五里

本漢舊縣屬蒼梧在荔江北因以爲名唐以縣置
荔州尋廢宋以求寧縣省入○鵝翎山在縣東五
里巖壑相承虛明變幻中有巨石如鵝故名或入
娥英語音相近宋甘叔異詩俗謂鵝翎木使然娥
英恐是古時傳谿聲流盡蒼梧淚斑竹林中聞杜
鵑○卧山郡國志云荔浦有卧石其形似人而舉
體青黃隱起可以祈雨小舉小雨大舉大雨○荔

江源出崇仁縣荔山今入武夷界輿地記云荔溪
多桂不生雜木樵爨皆桂有丹竹江出峯門瀨水
出魯山其流皆入焉○鎮錫山在縣北四十里險
峻如升昔人置關其上卽漢地理志之荔平關也
土名界牌峽○水經曰瀨水南過蒼梧荔浦縣註
云瀨水出縣西北魯山之東逕其縣西與瀨水合
出永豐縣西北瀨山東南逕其縣西又東南流入
于荔浦縣注于瀨谿又注于瀨水之上有瀨水關
瀨水又南左合靈谿水口出臨賀富川縣北符靈
岡南流逕其縣東又南注于瀨水○徐徵字君永

蒼梧荔浦人漢延熹中仕郡爲督郵適中常侍唐
衡遣客至蒼梧買珍奇客怙衡勢多臧所直又淫
酗過甚徵便收客郡市髡笞已乃白太守太守大
怒收徵付獄主簿請曰此人無禮恃強買賣旣侵
百姓又汚婦女徵上念明政據刑申耻今不使佐
郡無復爪牙之吏後賢郵當徒跣行奉諸貴戚
賓客耳太守不得已釋之郡中稱其敢決○宋梁
弼高要人調靖江荔浦尉以獲賊功改官僉書鬱
林一日假寐夢西海府君牒請云殿庭如玉居講
賓主禮請梁撰水城記梁援筆爲之記未就而覺

明日錄畢焚之無病而逝

富川縣

在府東北二百里

富江源出靈亭鄉南滙神源之水注於賀以入灘此縣命名之始也兩漢蒼梧郡下有富川縣唐天寶初更名富水縣尋復舊宋省馮乘縣入元及

我明如之○按漢書有萌渚嶠爲五嶺一與湖廣江華縣分界廢馮乘縣基在焉今屬富川賀縣之間晉陶侃之擊杜弘宋潘美之擊劉鋹岳飛之擊曹成皆由於此○漢地里志元鼎四年析臨賀鐘山地置富川縣今鐘山千戶所是去縣西南六十

里山上有石扣之如鐘鳴故曰鐘山也其後徙霽石山霽石者四時常有煙靄冒於峰頂又里許曰興雲山雲蔚卽雨人以爲候矣今治乃洪武初征南將軍韓觀所遷○朝冠山在縣東一里以形似之或謂朝陽之冠冕也又九里爲穿山其上有巖石皆五色蒼藤數根從下繞之又有石梁可逕而度故以穿名○石門山在縣東三十里四圍峭壁僅容一人入其中則平原曠野居民百餘家不減桃源○秀峯在縣北二十五里平地突起凡數十仞秀甲雲表唐開元間浙人毛裘爲賀州守之任

道經此峯欣然歎三疊閣之曰于此卜居焉及至
于官家因不返其次子曰亨曰貞即富川毛氏祖
也又十里爲槐坪崑崙水漫流傍多桃樹相傳有
老姬歲凶種此果其實以充饑樹留至今特盛又
十里爲龍山龍窟之水出焉遶郎山下過石巖多
穿內有鐫刻以二十里爲長標嶺耆老相傳唐李
靖討蕭銑時駐師標于此○白馬山在縣南二
十里其下有白馬泉又六十里爲碧雲洞洞門石
脉隱起廣陽島三字遠極分明近視如擘絮狀○
歌山在縣東南郡國志云昔有老人自少不婚而

善謳及病將死隣人送之此山老人歌以爲別餘
音數月不斷○犀泉在縣東北泉藏坎中坎在平
地深約丈許長不下三四丈橫可七八尺上覆綠
樹下列蒼崖始至見之坎石甚乾人呼則出不移
時水滿涸亦可待冬夏呼之水至皆然其靈異如
此○神仙傳云漢張陵在富川丹竈山煉丹脩道
晉永和九年九月九日登白霞山飛昇丹竈藥臼
猶存按在縣西南一百二十里今白霞口○五代
莫公失其名號爽朗適人居富川七歲辭母去
石巖中日跏趺靜坐人莫窺其所爲每相

巖外一夕俄不見以爲狎舉云按在縣東六十里
隱山其中有潛德巖鐫林公石牀四字宋元豐二
年林通達夫識○秦山在縣北一百八十里荊州
記云吳孫權時此山夜雷暴震開爲洞者六有石
鼓有壇昔傳仙人所居○志云林楚才有詩名與
清湘唐仁杰同時倡和毛奎字子文性寡嗜好力
學不倦建書院以授生徒自號澹然居士嘗作大
小二洞天記已上俱富川人

恭城縣

在府西北
一百里

本漢蒼梧郡地唐武德四年析置○燕子巖在縣

南里許外峻頂寬有石巖如燕巢然○金芝巖在
縣東三里石室高朗乳垂如芝○穿巖在縣西十
五里巖至深邃有谿源從中出舟行如在月中棗
氣逼人○銀殿山在縣東北八十里元和志云其
下有鐘乳穴十二所是以山際明白如銀或云常
有白雲繚繞遠視如宮殿故名○平島山在水西
方輿勝覽云唐葉靖祖墓在此靖有道術嘗與明
皇乘雲幸陳蒲堂家每歲上必來省墓去墓十里
有大悲寺元豐初有客葉姓者暫宿於寺因口占
詩八句僧但記其結句云明朝蓬島去白雪蒲頭

飛詰旦啓戶人馬遽失○周渭恭城人南漢時苦
于繁賦因率鄉人踰嶺將避地零陵爲賊所得脫
身走建隆初至京師見宋太祖上書時務太祖奇
之擢右贊善大夫歷試郡縣政以簡肅太平興國
二年遷廣南轉運副使初渭入中原妻子皆留恭
城及廣南平渭始還鄉里因奏去劉鋹無藝之征
鄉人德之爲立祠焉○國初蕭嘉祐新會人知
恭城縣推情與民民皆感悅山谷徭氓以片紙招
之依期而至無有後者聽政之暇與諸生講學士
風丕振

脩仁縣

在府治西八十五里

本漢荔浦縣地吳孫氏置建陵縣梁武帝立爲郡

隋開皇郡廢仍爲縣唐長慶三年桂管觀察使殷

侁奏縣名同肅宗陵號以縣有脩仁鄉請改脩仁

相沿至今○羅仁山在縣東二里又六里爲太平

巖又二十里爲青山○橫水山在縣西一里又九

里爲越王山又五里爲駱駝山下有駱駝水源出

龍山西南流注連水○縣之東陂水出晨口朝陽

水出平南皆入于荔以注灘江○縣北十里蘓山

宋皇祐間知縣狄道誨討山寇經此夢蘓子卿神

來棲因禱焉師捷請于朝卽其處建廟祀之賜額
順應因名山曰蕪山廟前有樹一株 國朝弘治
知縣葉某將伐之轟然有聲猛虎隨至乃慙而止

昭平縣

在府治南一百八十里

本漢蒼梧郡臨賀縣地武帝分臨賀郡於龍平縣
置南靜州開皇十一年廢以龍平屬桂州貞觀八
年於此置富州縣亦屬焉宋開寶五年廢富州以
思勤馬江二縣入龍平隸昭州宣和六年改爲昭
平元復爲龍平尋省入平樂 我朝萬曆四年復
置仍名昭平○靖尉山在縣南二里舊經云唐開

元中明皇從法師葉靖乘雲幸此山山有御座基
又幸前進士陳蒲堂家未幾其家生金笋蒲堂
亦不知所往○王臼泉在縣西北十里龍門峽左
宋治平間刻龍門王臼泉六字○木皮山在縣東
二十里又二十里爲蒼葉山又四十里爲北陀山
○獨山在縣北一百二十里巍然特立周圍皆峭
壁不可躋南一穴深三十步廣二十六步高千尋
可通山巔冠起居民緣梯而上下視以石擊之冠
不敢犯○五指山在縣東一百八十里其中深廣
入僅一線可容一人扼之則萬夫莫過○宋時有

翁宏者字大舉寓昭賀間不仕工詩送人下峽云
萬木殘秋裏孤舟伴夜猿南遊行云因尋買珠客
誤入射猿家細雨云宿城東春夜和花落古宮途
中逢故人云孤舟半夜上國十年心衡山處士
廖融南遊宏贈以詩云孤吟半落月老憶洞庭山
背稱佳句

永安州

在府城南一百六十里

本漢荔浦縣地元和志云武德五年置立山縣又
於此置南恭州貞觀八年改爲蒙州宋會要云熙
寧八年廢蒙州以立山縣屬昭州省東區蒙山二

縣入焉 我朝置永安州屬平樂府○方輿勝覽
云三石在城南十里僞漢時有兵入靖江過此黎
明遇獵者牽黃犬逐一鹿兵以鎗刺鹿徐視之石
也也而人大與鹿皆化爲石鼎峙道傍今一石尚
有鎗痕○蒙山在城東五十里唐蒙州蒙山郡治
所其名亦取焉○通天嶺在州北三十里相傳昔
立山縣人夜卧山巔至夜半嶺忽高及天其人頻
覺以手摩之歸白縣令往驗果然因發民丁周圍
鑿窟數十穴實薪燒之如龍吟者數日乃絕遂不
復見其穴猶存○銀江在州東源出平峒逕上龍

滙于西江西江源出茶山在州之西故名○激江
在州南源出古眉東至于藤南入于海○金麻江
在州北源出榕峒過山灣會古東古爽入于灘